

E Händy muss merr hawwe

Gestern hott de Schorsch oogerufe unn war gonz uffgereecht: Honnes, ich habb jetz aach e Händy, dess hott merr unsern Sohn geschenkt, unn wenn de willst, konnsde mich grad emol oorufe, ich bin nemlich noch om trainiern demett.

Prima, habb ich gesacht, weil e Händy muss merr hawwe. Gebb merr emol doi Nummer, ich ruf dich gleich oo. Unn ums ze lerne, schaltsde jetz emol doi Händy aus, dann dusdes widder oischalte iwwer die Pin-Nummer unn wartst uff moin Ooruf

E bisje später habb ich dann oogerufe. Erst hotts e Zeitlong getut unn dann habb ich de Schorsch geheert, wie er geschennt hott: Ich habb doch uff die grie Tast gedrickt, unn weg warer.

Ich habb die Wiederholtast gedrickt unn jetz wars Kättche droo: Katharina Baum - wer ist da?

Ei ich bins, de Honnes, unn eigentlich sollt ich joo de Schorsch oorufe.

Heer merr uff mett dem, der drickt uff dem Ding erum, der lernt dess nit

No ja, Kättche, sei nit so ungeduldich mett doim Monn. Gebb merrn emol. Schorsch? - alles klar?

Honnes, wenn dess Kättche merr nit dauernd enoi redde det, hätt ichs schon längst kapiert. Wenn die Melodie kimmt, drick ich die grie Tast unn wens ferdich is, drick ich die rot.

Unn warum machsde dess nit, Schorsch?

Ei weil die mich schockelich macht. Unn außerdem konnt ich dess Ding nit oischalte, weil ich merr de Pinn nit merke konn. Ich habb merrn jetz uffgeschriwwe. Ich ruf dich gleich zurick.

Es hott e Zeit gedauert, unn alses dann geklingelt hott, habb ich abgenumme unn gesacht: No siehsde, es klappt doch. Doo wars erstemol ruhich uff de onner Seit, bis jemand gefroocht hott: Wer ist denn da?

Ei ich, de Honnes, unn habb awwer gleich gemerkt, dasses nit de Schorsch unn aach nit dess Kättche war, sondern die Fraa von der Versicherung.

No ja, e Verdelstund später war dann de Schorsch om Telefon unn ich sach: Siehsde, Schorsch, es hott doch geklappt.

Naa, gibt de Schorsch zur Antwort, ich ruf vom normale Telefon aus oo, dess Kättche hott geschennt unn gesacht, vom Händy aus oorufe wär so deier.

No ja, Schorsch, ess wär doch nor zum Probiern.

Doo hott de Schorsch erum gedruckst: Naa, hottse gesacht, ich wisst jetz wies geht unn ich solls nor im Notfall nemme, wenn ich unerwegs wär unn wenn was passiern det. Unn dasse mich erreiche könnt, wenn ich nit hoom kumm.

Heit habb ich de Schorsch uff de Strooß getroffe unn gefroocht:
Unn Schorsch, wie klappt dess mettem Händy? - hosdes debei,
zeich merrs emol.

Doo greift de Schorsch in soin Säckel: Hier, schee kloo, odder?
In dem Aacheblick hott dess Ding de Radetzki-Marsch gespilt unn
de Schorsch meld sich: Georg Baum, ja bitte? – unn sacht dann: In
fünf Minutte, Kättche. Dann hotter geknorrt: Honnes, muss merr
wirklich e Händy hawwe? Glaab merrs, wenn ich den erwisch, der
merr dess gesacht hott ...
Unn fort warer.

Eiern Honnes